



Alver kommune

Salhus, 20.08.2020

Dykkar ref.:

Vår ref.: 076.20 LEK

Høyringsuttale Sak 24/20 Faste tilskot kultur

For Vestnorsk utvandringssenter, MUHO, har det vore særskild viktig og verdfullt å ha årleg og fast tilskot frå Radøy kommune, og er avgjerande for drifta av Utvandringssenteret. Det har gjeve oss ein stabilitet og høve for kontinuitet og langsiktig planlegging. Vi ser difor positivt på at Alver kommune no ønskjer å etablere ei ordning med faste årlege driftstilskot, for å oppretthalde det føreseielege og stabiliteten i støtta til drifta.

Vestnorsk utvandringssenter, ei avdeling i Museumssenteret i Hordaland, MUHO, ligg på Sletta. Utvandringssenteret vart bygd opp på dugnad og oppretta i 1997. I 2010 vart det lagt til som konsolidert eining i Museumssenteret i Hordaland, og sidan då vore drifta som del av det konsoliderte museumssystemet.

Sjølve bygningane på Sletta, Emigrantkyrkja og dei seks husa i Prærielandsbyen, er eigd av ei stifting, som er ei forlenging av dei som sto bak senteret då det var bygd opp av dei frivillige og eldsjelar. I konsolideringa gjekk alt ansvar for drift med vedlikehaldsansvar og formidling til MUHO, medan sjølve eigarskapet ligg i stiftinga. Radøy kommune hadde i stor grad bidradd med arbeidsinnsats knytt til vedlikehald og stell av senteret.

På eit tidspunkt vart det i staden for hjelp med vedlikehald, gjort om til ein fast årleg sum, slik at ein i større grad kunne jobbe meir planmessig med reparasjonar og vedlikehald på bygningane, i tillegg til stell av bygningar og uteareal. Dette resulterte i at vi kunne tilsette eigen handverkar som kunne ta seg av heilskapen i det fysiske anlegget, i tillegg til oppgåver knytt til arrangement, aktivitetar og utstillingar. Vestnorsk utvandringssenter er ein viktig aktør i Alver og i Vestland. Vi har i eit normalår over 30 gruppeturar som er på dagsbesøk hos oss, og som gjerne kombinerer dette med eit kafé eller restauranttilbod i regionen. Gruppene kjem både frå Bergen, lokalt i kommunen, frå andre delar av Vestland, og internasjonalt, både frå USA og elles.

Vi er også med i Ullruta og Ullveka som er store satsingsområde innanfor reiselivet i Nordhordland. I vår nyopna museumsbutikk legg vi også vekt på å ha lokalproduserte varer, i tråd med UNESCO biosfæreområde, og nyttar KIM Knarvik industri og miljø sine varer som både er produsert lokalt og av naturlege materialar. I tillegg sel vi ullprodukt laga i museumsfabrikken i Salhus og ullgarn av villsau frå Lygra, som begge nyttar Hillesvåg ullvarefabrikk til å spinne garnet.

Vi har dessutan opp mot 20 årlege arrangement som trekk publikum får heile Alver kommune, med eit breitt spekter av målgrupper, frå familiearrangement til konsertar, utstillingar, førestillingar og seminar. Vi er derfor ein møteplass for folk i heile kommunen og regionen.

Vi har også hatt aktivitetsdag i sommarferien i samarbeid med Frivilligsentralen i Alver.

På Utvandringssenteret formidlar og fortel vi ikkje berre om den norske utvandringa, men set dagens migrasjon i samanheng, både når det gjeld flyktningar, migrantar og arbeidsinnvandring. Dette er tema som vi planlegg å vektlegge endå meir i tida frametter. Vi har tidlegare hatt samarbeid med NAV Flyktningetjenesta om prosjekt og utstilling, dette ønskjer vi også å få til meir av.

Vi vender oss til mange målgrupper frå barnefamiljar til pensjonistar, og har som målsetting å få større del av skuleklassane til å besøke oss, frå barneskule til vidaregåande, gjerne på fast basis for utvalde klassetrinn. For å kunne gje eit slikt fast tilbod er det også viktig å ha ei føreseieleg og stabil økonomi.

I 2025 er det 200-års jubileum for den starten på den norske utvandringa til Amerika, og vi vert med i ei nasjonal arbeidsgruppe for dette jubileet. Også her vil fokuset ikkje berre vere den norske utvandringa, men også innvandring og migrasjon gjennom tidene, og ikkje minst i vår eigen tid. På den måten ønskjer vi å ta med oss i historia og inkludere, ikkje berre dei som reiste, men også dei som har kom til landet vårt som flyktningar, arbeidsinnvandring og migrantar.

Vestnorsk utvandringssenter, MUHO, ser altså positivt på at Alver kommune ønskjer å få ei ordning med faste driftstilskot, og vonar at vi på den måten vert føreseieleg slik at vi kan halde fram med å ha langsiktige planar og vedlikehald av anlegget, og jobbe vidare for stabile tilbod mellom anna til skuleverket, med barn og unge i grunnskule og vidaregåande skular.

Vennleg helsing

Lena Eikeland Kutschera (sign)
avdelingsleiar

Elisabeth Halvorsen (sign)
direktør